

Тәм  
номеран  
лұңтаты:

Евдокия Вожакова  
хәншас, муй вўрн  
педучилищя  
вөнлтыйлды юхтас

2-мит лопасн



Хур вўты  
мари хә  
Денис Речкин  
вәлупсәл  
олаңан

3-мит лопасн



Нуви сәңхум  
вошн «Сәвум  
хәнши» немпи  
вөйтантупсы  
мәңас

4-мит лопасн

# ХАНТЫ ЯСАҢ



Ханты-Мансийской автономной  
округ-Югра газета

СУББОТА 11 февраль 2012 оҗ № 6 (3346)

Стад 1-мит ноябрь 1957-мит оҗ вўш эвалт

АЙКЕЛАТ

## Иньщасты вер

**Мәһум лапатн Ёмвошн мирев вәлупсы  
лерамтты институт ёх «Фокус-группа»  
немпи еҗта пәсан ләщатсат. Лыв арсыр  
вошаң хуятат ияха акатсат па сыр-сыр  
верат олаңан иньщассат. Лыв уша версат,  
муй мирев округ вәлупсы олаңан нәмаслат,  
муйсар ям муй ағтум верат Хәнты-  
Мансийской автономной округ хуца вәлдат.**

Надежда Новьюхова  
иньщасас, муй пәты ар  
няврём тайты хоттел ёх  
вухн яма аң нәтлыйт?  
И няврём пәты тәп нял-  
соткем шойт вух мәды,  
тәм йисн щит вух хән?  
Щәлта вўт кәртат пў-  
ңалн мўв илпи питы  
вуй кәһшты тәхет шеңк  
мўвев шәкаллат па шу-  
ши мира вәлты турас-  
ладат.

«Луима сәрипос» нем-  
пи вухаль мир газе-  
тайн рәпитты не Вален-  
тина Узель (Хозумова)  
лупас, муй пәты юхи хә-  
щум олатн машинайт  
яңхты кев ёшат лотаңа-  
паяңа йисат? Щәлта лўв  
ясас, хути кев ёшат  
эвалт округевн ищи  
суртат тывсат. Па вән  
вошат эвалт тыв икет  
юхтыйлдат па хәняя,  
нартамлы вәнтатн кў-  
раң войт вәлдат, юха-  
натн поханман хўд вәл-  
пасладат.

Ма шуши мират ла-  
варт суртат олаңан пу-

тартсум. Щит вўдең па  
хўд-вой вәлпаслаты ёх  
шеңк ай тылащ вух  
ёша вўлат. Щәлта луп-  
сум, хути юхи хәщум  
олатн шуши мира ла-  
вартшак йис Ас хўлат  
вәлпаслаты. Тәп мўң  
мирлўв пәты хўд –  
щит нянь юкана вулаң  
летут. Рыбинспекция  
ёх хәнты рыпак ёх  
вухн пунты па брако-  
ньера адыщаты питсат.

Щәлта социальной  
реклама ләщатты пәты  
хурат алысыйт, тәп иса  
юхтум ёха аң мәстасат  
щәта хәншум ясәт,  
щирн елды йилуп ясәт  
олаңан нәмасты мосл.

Юволаңан йилуп  
«Наш регион 86» нем-  
пи газета алысы па  
иньщассы, мәстас муй  
аңтә, муйсар лопас хул-  
на ләщатты мосл. Ма  
лупсум, хути шуши  
мират вәлупсы олаңан  
лопас ат ләщатды.

Людмила ШУЛЬГИНА



А. ВНОГДИН ВЕРУМ ХУР

## Ямал мўв эвалт 80 вўды нәхалсы

**Мәһум оҗн Югра мўв дума шуши мират ассамблея депутатат  
«Йилуп вўдең хоттел ёх» немпи вер ләщатсат. Щәлта тәм унтасн  
Няксимволь кәрт пўңалн вәлты Самбиндалов рәта вўды тайты вер  
йилпа нух ләщатты пәты 70 вўдыйн нәтсат.**

Савва Самбиндалов  
семьяйл пида Кев лепн  
Турват немпи мәлаң  
хонаңан вәл. Вухаль  
мир пәты вән емаңхатл,  
вантә, вўдылы ёх йил-  
па вўдең тащ лавалты  
вера вўянтсат. Щит пә-  
ты Хулимсунт кәртан  
вәлты не Анна Нико-  
лаевна Алгадьева аш-  
колайн вәлдатты эвет  
пида Няксимволян ари-

ты етнхот ләщатсат.

Мосл ястаты, хути  
щи тухалпи Ямал мўв  
эвалт Советской райо-  
нэва 10 вўды нәхалсы.  
Челябинской па Мос-  
ковской областьңан ху-  
ца хот войт тайты кәт  
хуятңан ищи 17 вўды  
ләтсаңан.

Натаң нөрүм эвалт  
Усть-Манья кәрт вәнты  
800-кем верста вән хә-

лүм машинайн вўдәт  
лелман тәсыйт.

Тәм лаварт пәнт ола-  
ңан Ольга Корниенко  
кина верас па елды,  
мосаң, «Дискавари» те-  
леканал хуца щит вер  
олаңан вантты питлўв.

Хәнты ясаңа  
тулмащтас  
Людмила  
СПИРЯКОВА



## Рәт ясаң вәлдатты ләңхалат

**Нуви сәңхум районан шуши мир культура  
тәхийн йилуп оҗн Ас хәлты тылащ вўш  
эвалт рәт ясаң вәлдатты урокат верантты  
питсыйт. Щи мосты вера вўянтас Ас-угорской  
институт Нуви сәңхум вош филиалн рәпитты  
не Римма Михайловна Потпот.**

Лўв щив юхтум хуятат арат,  
амааматщәт хўват рәт ясаңа  
вәлдат. «Ма хоттел ёхлам»,  
«Нәң олңенан путарта» па  
па әмащ ай путрупсәт хәнш-  
ты партал. Ванлтал, муй  
щирн тўңщираңа хәнты яса-  
ңан путартты мосл. Щимащ  
вөйтантупсәт юпийн мет ләң-  
халан рәт ясаңан путартты.

Щит пәта Римма Михай-  
ловная вән пәмашипа ясаң  
луплўв.

Лўв мўңева рәт ясәев сәма-  
ңа тайты нәтл.


Шуши мир культура  
тәхийн рәпитты хуятат  
Хәнты ясаңа тулмащтас  
Надежда ВАХ

Там ол төндүп тылаш 14-мит хатлан Ёмвош педагогической училище (колледж) 80 ола йил. Мәһүм олн ши емаңхатл вўраңан мўң щәта вәндтылүм ёх олаңан хәншты пйтсўв. Интам мўңева Евдокия Николаевна Вожакова хәншас, хутыса лўв щәта вәндтылас. Ши хуятат, хуйтат ищи ши тәхи етшуптасат, мўңева пищмайн вәндтылты мәр олаңан ат хәншлат.

Надежда НОВЫЮХОВА

## Муй вўрн ма педучилищя юхатсум

Хән Касум ашкола хуца вәндтылты пураем етшас, экзамен мәты хәтләта Сўматвош РайОНО кәща ими юхтас. Щит Валентина Ивановна Ахтямова. Лўв и ләпат хәтл мәр интернат хот йитн хәдас. Валентина Ивановна мәһема шеңк мәстас, мин етнатн арсыр



Евдокия Вожакова  
1967-мит олн

верат олаңан путартсумн. Лўв мәһат иньшасас, ма аңкиащи тәйлүм муй па аңтә. Лўв мәһема лупас: «Нәң сәмәһалдан шеңк шумалеңан, мо-саң, нәң Дуся няврематн шәкатлайн». Ма В.И. Ахтямовая юхды лупсум: «Кашаң хәтл ма аңкем-ащәм, апщәһаллам па апалнеңем олаңан нәмаслүм, лыв худна айшакат».

Ма путрем хәһантмал юпийн Валентина Ивановна лупас: «Нәң, Дуся, ал тыштема ёх-дан олаңан, нәһена мосл елды пәда вәндтылты».

Ма нивл класс пәта экзамен-лам мәһслам. Па елды вәнд-тылты мәһнты вух мосас. Ши олаңан ма Надя упем пида путремасум. Щит Надежда Карповна Молданова, Сантар вәртем ими. Нумас версум, еша рәпитты мосл. Мәһсум ай нявремат тәйты па лава-лты кәща не пида путрематы. Кимат хәтл ма рәпатая ши вўсыном. Хәлүм щос мәр хәт-лапат луват пушхиет хуца алаң вўш эвалт рәпитсум, хәтл юпийн хәлүм щос мәр мет ай нявремат лавадман вә-сум. Хән ай нявремат аңки-лаңн юхи вўдыйт, ма етнатн нявремат ләматсухат па ул-ты сухат нух пәсман вәсум. Щиты ма кашаң хәтл лүңта аң рўтышуман кәт тылаш әр аң шалитман рәпитсум. Вәндтылты мәһнты пәта 150 шойт вухн мәһсыном. 30-кем шойт вух Надя упем мәһс.

Лапкайн 16 шойт вухн лў-

ңан тәйты вансах па кўра ләматты утһан ләтсум. Ай тухлаң хопп Сўматвоша мәһ-сум. Щәта ма РайОНО кәща неңем хот вәйтсум. Валентина Ивановна ияха рәпитты неңал Анна Петровна Конева партас ма пидама пәльница хота яңхты. Щәта ма тохтўрн не-пекн мәһсыном, ши юпийн мин яңхсумн ЗАГС хота, щәта сәма пйтүм непекем йилпа хәншса. Кимит хәтл вән ну-ви «Казахстан» немуп тўтаң-хопа ләлтасәһом. Щиты ма Ёмвоша ши юхатсум.

Педучилища хот ма сора вәйтсәм, арсыр мир эвалт инь-шасман. Щив вән нуви хот дыпия юхи лүңсум, кәща хот ов хонаңан арсыр эвет, пухат вәсат. Лыв мулты пәта мәһнат



Людмила Зубова  
1967-мит олн

сырыя кәща хуца лүңты партсәл. Хән ма щив лүңсум, вўща ясаң тәп лупсум, пәсан вутпийн ухал нувиә вотум пираш ики омсас, ма пәдама аңкармас па лупал: «Нәң опраш немен Рандымова. Ям ши, вәндтылты юхатсан вән айн вәндтылүм тәһия. Тәп шеңк шаль, лўв вәндтылты етшумал юпийн хутащ йис».

Хән педучилища кәща Геор-гий Тарасович Величко вән аюм олаңан нәмалмас, ма сә-мем лыпи хошум рўвн юхат-са, нумсәм нух тўңматас. Ма мосты непекем пәсан әхтыя пунсаллам, лўв нух вантсәлә па айлат имия лупас: «Тәм әви ләты-яньщты хота тўвә, тәрүм пәты ат лапатлы па айлат ёх вәлты хота ванлтә».

И мәтта хәтл, экзамен мәты пурая йис. Мет сыры рўщ ясаң па литература вәс, щәта И.А. Крылов хәншум басня мәһема путартты мосас. Ма ши утат нумаса пунман аң



Для вас всегда сюда открыта дверь.

тәйсум, ашколайн вәндтыл-мемн мўң щитат тәп нух лў-ңатсаллўв. Экзамен мәты неңев Зоя Константиновна Орлова лупас: «И.А. Крылов хәншум ут аң ки нәмләң, щирн Н.А. Некрасов хәншум стихат эвалт мәтта путар лўң-та». Ма яма нумаса пунман тәйсәм «Размышления у парадного подъезда», хута поэт рәт мўвал олаңан хәншал, хутыса рўщ ёх вәлдат. Хән ма ши стих лўңатсум, ма нәмассум аңкем-ащәм, апщидам олаңан па нумсәм вана ювман, сәмийн-к-лам илды венш пўңал эвалт худисат. Па ши тумпи нәмас-сум, экзамен тәм ол аң ки мәһлүм, ма юхи аң мәһлүм, мәһема шеңк едәм вәс. Ма мулты тәһия рәпитты вўянт-лүм па па ол йилпа щив сон-тумалүм.

Экзамендам хулығыа мәһ-лам па педучилища хуца вәндтылты пйтсум. Ма иса тәһом әрем вәндтылты вере-ма пунсәм. И мәтта рўтыщаты хәтлан ма лапка хотн Нәля тохтўр ими шуваласум. Лўв Тәрүм лор вошн тохтўра рәпи-тас, хән мәһема лапат ол вәс. Нәля Ильинична Башмакова мәһнат шай яньщты юхи вох-салә. Па ши тумпи Надя упем лўв ләйһала пищма хәншас. Щиты ма айкемн Руфина Ивановна Хозяинова пида вәй-тантсум. Тәм кәт тохтўр име-ңан пида 40 мултас ол мәр



Федосья Сопочина  
1968-мит олн

мўң ләһәңа вәллўв. Лын хуца-на ма хот хәри нух лүхе-мийлсум, ай нявремат пида омсыйлсум.

Педучилища хуца клас-сыйн кәща неңев Татьяна Ефи-мовна Картина вәс. Лўв мўң хущәва кимит аңки юкана тәйсәв. Кашаң хәннехә пида ям, нявлак ясаң вәйтас. Емаң-

хатлат пурайн арсыр әмаш утат ләщатылас. Нәмләм, хән аңкет емаңхатл пурайн эвет лыв аңкидал олаңан путарт-сат, щәлта пластинка эвалт мўң аңки олаңан ар-сув хә-лантсўв: «Ешак, тыһаң нәң, аңка, вера мослан интам...».

Ма тәта вәндтылмәм пу-райн баяһаң арсыр сыйт юнт-сум, лүхн Ёмвошев сәңхумат



Татьяна Ефимовна Картина  
1970-мит олн

эвалт хәтатлясум. Кәһсупсы хәтлатн па эвет па пухат кўтн лүхн кәһсум. Ши тумпи якты яңхийлсум. Мўһат якты вәндтас Людмила Токаренко. Нина Алексеевна Тебетева пи-да арсыр хурат олюпп хәнш-ты вәндтылсўв. Кашаң хәтл лүңта арсыр верата вәндтыл-сўв. Тәп муй тәһи эвалт ши арат әр холумсўв. Рўтыщаты хәтлатн тўтыюх сәварсўв хот дыпәв хошмалты пәта. И хот йитн хәт па яң хуятн вәсўв. Мўң эвет кўтәвн ләхса-ңа, яма ияха нәтасман вәсўв. Хән вәндтылты пураев ет-шас, мўң кўтәвн пищма хән-шсўв. Ин тәмхатл вәнта мўң арсыр вошатн, кәртатн вәй-танттыллўв па вәндтылүм ол-лўв олаңан путремаллўв. Мўһат вәндтүм ёхлўв: нарасты па ариты – Геннадий Михайло-вич Михайлов, Валентин Яков-левич Щербаков, рўщ ясаң па литература – Генриетта Алексеевна Бусыгина, тәса па яма хәншты – Антонина Георгиевна Петровец, матема-тика па арифметика урок мў-ңева Илья Демьянович Петро-вец путартас.

Ма ин тәмхатлат вәнта нә-маслүм, мўң вәндтылүм оллўв шеңк әмаш вәсат. Сәм эвалт етты ям яһәт луплүм мәһнат вәндтүм ёхләма.

Евдокия РАНДИМОВА  
(ВОЖАКОВА)



**Тәмхатл ма ләңхалум мари айлат хә Денис Речкин олаңан хәншты. Тәм әмәщ па нях-мулаң хәннәхә Йошкар-Ола вошн «Марий Эл» немпи газетайн хур вўты хәя рәпитл.**



## Хур вўты мари хә

Денис 1980-мит ол тәнлуп тыдащ яр-хәсмит хәталн Йошкар-Ола вошн сема питас. Аңкел – Алевтина Алексеевна, лўв Марий Эл республика хуща мўв хәри верат тәты министрствайн рәпитл. Ащел – Иван Никандрович – ар ол мәр хур вўты хәя вәд. 2010-мит олн «Заслуженный журналист республики Марий Эл» нем холумтас. Ай пура вўш эвалт Иван Никандрович әл хәннәхә киньща мўв-ават пәла пасыра вантас, кашаң утыенан тәп хурам шивадас. Мосаң, щит пәты Иван Никандрович вәтаң хур вўты икия йис. Тәмхатл Марий Эл мўвн вәдты мирн иса вәды па сәмаңа тәйды.

Вәна ювмалн Денис пух хўв ән нәмәсас, хулта вәндтйылты мәнты, лўв ащел иты хур вўты хәя йиты ләңхас. Лапат ол луваттйын ащелн хур вўты «Киев-19» немпи щўңкан мойласы. Денис щи олаңан щиты путартас:

– *Ма щи пурайн кимит классан вәндтйылсум. Щи мурта аматсум, хән ащемн щимащ мойлупсийн ләтсыюм. Наврәм вәндтаты не Тамара Гавриловна Мосунова хән шивадаслә, хуты ма хур вўты щўңкем әшколая тәсәм – нух амтас. Щәлта ияха әкташман тәлаң урок шәп хур вўсўв. Щи пурайн мўң хурат шәңк лавадман тәйсўв. Тәм йисн па кашаң хоттел әх веритл щи ут ләтты па арсыр щирн хур вўты.*

Әшкола етшуптумал юпийн мари айлат хә Чувашской государственной университета хур вўты тәхия вәндтйылты мәнәс. Щәта вәдмал мәр Денис сот щу-

раскем арсыр хур верас. Щи кўтн Марий Эл мўвн ләщатум сыр-сыр кәсуп-сәтн кәсас па арсыр ишак непек еша павтас.

2002-мит олн вәндтйылты тәхи етшуптаслә па әхатшак «Марий Эл» немпи газетая рәпитты мәнәс. Тәмхатл вәнты каркам мари хәяе щәта рәпитл па хурат хўват арсыр мира хурамаң па әмәщ хура-сат ванлта. Щи тумпийн Денис «Экономика, бизнес па реклама» немпи вәндтйылты тәхийн айлат хуятат тўңщирана хур вўты вәндтал. Тәта мосл ястаты, хуты Денис Василина апщи тәйл, лўв ищи айкел әкатты па хәншты неңа «Телесемь-Йошкар-Ола» немпи журналн рәпитл.

2005-мит олн Денис Елена айлат не пила вәтаңа йис па имухты яха вәдты-хотты питсаңан. Кәт ол мәнәс – нуви тәрума олаңмит Ульяна әвие юхтас. 2010-митн кимит Екатерина әвие сема питас. Щирн интам айлат семья кәт эвәңан енмалтал.

Мўвев давалты әх емаңхатл едпийн ма Денис Речкина вән вўща ясаң китлүм. Тәм ушаң-щираң па хуят пәла сәмаң мари хәяе хур вўты вер шәңк сәмаңа тәйл. Щирн ләңхалум ястаты: «Тәрум Ащел, Тәрум Аңкен миюм хур вўты вер ищи саты елды тўвә. Ләлн нәң хурлан хўват кашаң хәннәхә мўң әмәщ па хурамаң финно-угорской вәлупсәв олаңан уша ат верас. Хўв йис, хўв нәпат нәңәна, уяңа-пицаңа хоттел әхлан пила елды вәдты па рәпитты!»

Ирина САМСОНОВА

## Вәлупсы мәр катлты хошл

**Газетайт есалты әх мўв луваттйын арсыр йилуп верат яма вәдат па нух хәншлат, әхат мирн лўңатлайт. Нын щи вәдлан, журналат, газетайт хур ән ки тәйсат, па щирн вантассат. Щи пәта тәса хур вўты удмурт неңие олаңан хәншлүм. Лўв Удмуртия мўвн Ува вошн вәдты «Увинская газета» хуща рәпитл. Тәм айлат неңие Ольга Чичирко пила путартсум па иньщассем.**

– **Муй вурн нәң айкел кәншты неңа йисан?**

– Әшколайн нивл классн вәндтйылдмәмн йис пурмас шәвиты хотн шәңк рәпитты ләңхасум. Кәт ол мәнум юпийн Удмуртской госуниверситет хуща айкел хәншты әх вәндтаты питсайт. Щи пурайн мәнәма телевизор хўват Владислав Листьев ләщатты айкелат әмәщ вантты вәс. Мәр вәдмәм кемн роман ин хә әнтәма йис. Щирн так нумас версум, ма шоп айкел кәншты неңа йилум. Мўң вошевн «Увинская газета» тәйсўв. Ма щив айлтыева арсыр йилуп верат олаңан хәншты питсум. Әшкола етшуптумем юпийн нумас версум Ижевск воша Удмуртской госуниверситета айкел хәншты тәхия вәндтйылты мәнты. Имухты щив ән путласум. Кимат пўш тәп экзамендам тәса тывсат.

– **Ин нәң хур вўты яма хошлан, путартә, муй иты мет олаң пўш щи вера кўншемәсан?**

– Вәндтйылты етшумем юпийн рәпатая вўянты щира газетая мәнсум. Щәта ух редактор хә П.В. Люкин лупас: «Мўңева тәп хур вўты хошты хуят мосл. Нәң хур вўты хушап ешн катлйылсан?». Ма лыпи нумсемн нәмәсум: «Вәндтйылдмәм пурайн щимащ ут ванкўтлы еша ән вўйләсум. Мўң университетәвн хур тәса вўты верат еша тәп уша версалўв. «Технические средства журналистики» немуп ут тәйсўв. Щәта хур вўты хушап вәндтасўв».

Я-а, щи имултйын «Увинская газета» ух редактор ики Пётр Васильевич няхаң веншан нәхмас: «Мўңева тәмащ хуятат мослат». Ин рәпатайңа йисум па имухты «Зенит» немуп хур вўты хушапн катлуптасыюм. Щәлта мет олаң пўш хәхалты, наварты әх хура верты

китсаюм. Ин па яма нәмләм щи хәтл, немалт ушаң ут ән тывас. Ма мурта холдасум. Вантә, щимащ вер сора хән тывл. Щит наварматы хуят нумас тәйты мосл. Тәп ма шәңк хурамаңа вән хур вўты хушап пила вантассум. Хур вўтйын нәратты щўңк сый мәнәма ищи вера мәстас. Щирн нәмәсты питсум, ищимурт ма мет тәса хур вўты вәндлүм.

Имудтйын хўр вўты вер шәңк яма хошты Владимир Карманов па Виктор Боровиков вәтаңа версадам. Хўв мәр лын шәншлан сайн эвалт рәпитсум. Щирн ма хурлам еша тывты питсат. Щәлта айлтыева атәлт хур вўты олңитсем. Әхат вет ол кем мәнум юпийн әмща верты хурлам вәтаң әхлама шәшсадам. Итәх хуятат лупсат: «Нәң, хәннәхә веншан вәлупсы мәр катлты пәклан». Щи вўш эвалт таксара хур вўты вера кўншемәсум. «Фотодело» немуп тәхия яңхты питсум. 2009-мит олн ма вўюм хурлам енмум Ува вошемн па Удмуртия мўв луваттйын мир кеша вән ванлупсәт ләщатйылсум.

– **Муйсар хурат нәңәна әмәщ верты?**

– Мәнәма хәннәхә веншат хура вўты мет мәстал. Кашаң хуят лыпи нумас венш эвалт кәд. Щимащ рәпата ай кәртатн тумпел ям верты. Әмәщ пиращ хуятат па ай нәврәмиет хура вўты. Ипўш ай воша яңхсум. Шәшлүм вош хўлы хўват, шува-ласум и катра хот па нәмәсыйлүм: «Щив вана рәхлүм ки, алпа, ям хур верлүм». Щи нумасан вана мәнсум. Хот ов хонаңан кўтуп арт нәштуп ими долъ. Лўв семңал, веншал вера олүпн нерман вәсәңан. Ма ин ими пила путара тўлүмсум. Щиты долътемн сахат, ов пўншаньщас па пәтлам кәтра хот эвалт тәләң әптуп ай әвие ким рәкнас. Щи мәр шәпие



имухты хура вўсем. Лўв юпелн лыпи пўнуп вән кәти ким етас па ин әвие кўрңан хонаңа пуркуман улумтас. Щит ищи хура версем. Вантә, тәта ма пилама ән вәдүм хуятат хурлам эвалт тәләң әштуп ай әвие, лўв кўрңал хонаңан улты кәти шуваладат.

Щи тумпи шәңк әмәщ арсыр мир дыв юкан ләмәтсухладн хура вўты. Тәм лўң Югра мўва хәнты мир вәдты Шәншвоша яңхсум. Щәта шуши әх арсыр ермак хурамаң ернасладн, нюр иса дыв мўв Аңки лыштат. Ма пәкмем кемн мурта хур вўсум. Щит мўңева вән мойлупсы вәс. Йис Югра мўв ма сәмәмн хәщл. Щәлта тәрум арсыр пура, мўвев хурам, сўсн ермак вўщлүм лыптаң хәтлдат мет әмәщ хура вўты. Тәдн кивартум сўмтат, товийн вельщи нух верлүм юханат, щимащ аняйт хуратн хәйты вән амат.

Ин Ольга Чичирко йилуп хураң ванлупсы ләщатл. Лўв Шәншвошн вўюм хурлад Удмуртия мўв арсыр тәхетн алийлсәлә.

Ульяна МОЛДАНОВА

## Сэвум хәнши

Тәм ванан Нуви сәңхум вошн шуши мир культура тәхийн рәпитты хуятат «Сэвум хәнши» нәмпи вейтантупсы верантсат. Шив Нуви сәңхум район көртат эвалт хәншаң вейт тыйты неңат юхтыйдсат.



Оксана Сидак



Валентина Тользина



Ирина Фирсова

Түкъякаң көрт эвалт юхтылум не Надежда Гришкина «хә шоп» нәмпи хәнши ванлтас. Нуви сәңхум вошн вәлты Россия народной мастер нем тайты ими Ираида Неттина «ай емаң вой» хәнши олаңан путартас. Ольга Сайнахова Полнават көрт эвалт «пелна хумалха» хәнши тыйс. Ирина Фирсова – «ай сорт пеңк» хәнши.

Шәдта верантты хуятат катра пурайн тыюм пурмасат, йис хәншәт нух вантсат. Муй щирн аңқаңкидал па аңкидал вейт тыйсат, муйсар хәншәт сыры вәсат.

Щи тумпи тәм тыюм вейт, посат, ернасат па па эмащ утат ләтты щир вәл. Хуйтат ләңхалат, Нуви сәңхум вошн «Тумран сый» нәмпи тәхийн мосты пурмасатн тыйдыт.

## Нуви сәңхум хурамат

Тәмхатл Ёмвош округев луваттыйн ар тәхи вәл, хута шуши мир ной сух, щәшкан, тәхты эвалт арсыр эмащ пурмасат ёнтлат, сәк эвалт сыр-сыр хурамаң щўңкат кәратлат. Вошаң муй көртаң кўлупатн немасыя тәхет пўншман вәлдат, хута нявремат шукщаты вера вәндталыйт. Щи верум пурмасат ванлтаты пәта арсыр вейтантупсәт па ванлтупсәт верантдыт.



Мойң ёх

Мет олаң пўш Нуви сәңхум вошн «Нуви ат» тәхийн «Узоры Белолярья» нәмпи ванлтупсы ләщатсы. Хута 400 мултас сәк эвалт кәртум, тунты, тәхты, хўл сух эвалт верум пурмасат вәсат.

Шив Нуви сәңхум район Касум, Полнават, Түкъякаң, Паштар көртат эвалт вераң ёх верум утлад тәтляслад.

Щимащ вер щи пәта ләщатла, ләлн аршак хәннехә мулты шукщаты верата ат вўян-тас па айлат ёх ищи щи вера ат катласас.

Щи тумпи щив юхтум верантты хуятат кўтәлн вейтантыйдсат па хошты щирдал ванлтасат.

**Россия народный мастер нем тайты не Ирина ФИРСОВА**  
Хәнты ясаңа тулмащтас Надежда ВАХ

Нуви сәңхум район



Людмила Кондрашина



Надежда Гришкина

Адресэв: 628011, Ханты-Мансийск, Комсомольской улица, хот 31  
Телефонлўв: редактор факс 8(3467) 33-36-82; редактор ләңкар не 33-24-02; корреспондентат 33-36-07; факс 8(3467) 33-36-82; 33-17-52; E-mail: luima@ugracom.ru

Газетаев постум непек тайл Е-0214  
Учредитель — Ханты-Мансийской автономной округ-Югра Правительство.  
Издатель — Ханты-Мансийской автономной округ-Югра общественных связей Департамент. Комсомольской улица, хот 31

Газетаев редакция хотәвн версәв па печатайтты есалсәв 08.02.2012 одн, 13.00 щосн Индекс 54393 Тираж 449 Заказ 49

Газетаев есалты тәхи (типография)  
адрес: 628012, Ханты-Мансийск, Мира улица, хот 68

**Ух редактор**  
Раиса РЕШЕТНИКОВА  
**Ух редактор ләңкар не**  
Надежда ВАХ  
**Ответственной секретарь**  
Надежда НОВЫЮХОВА